

# *Go HLATHA MMELE WA MORENA*

 Ke a go leboga, Ngwanešu Sullivan. Mantšiboa a mabotse, bagwera. Ke . . . Dulang.

<sup>2</sup> Go bose go ba fa gape, bošegong bjo, ka tlase ga tlhaka ye le magareng ga batho ba bakaone ba ba Bakriste. Gomme re letetše Modimo, bošegong bjo, go dira ka go fetiša, ka botlalo, ka godimo ga tšohle re ka kgonago go di dira goba go di nagana. Re a tseba gore Yena ke kgonthe.

<sup>3</sup> Ke ba bakae ba ikwelago gore le fodišitšwe bošegong bja go feta, ka ditirelong? Oo, seo se no ba gabotse. Re lebeletše ka moka ga lena go fodišwa bošegong bjo. Gomme ke—ke nagana gore re sa na le dikarata tša thapelo. Billy ga se a fa le ge e ka ba efe, o mpoditše, gobane ga se re tšee eupša feela di se kae tša tšela bošegong bja go feta. Gomme go ka no ba ba bangwe ba batho bao ba ikwetšeego gore ba tla rata go tla ka mothalong wa thapelo. Goba, re ka no šomiša tše dingwe tša tšona moragwana gannyane, mo bošegong, bakeng sa mothalo wa tlhatho. Ke . . . Seo ke se . . .

<sup>4</sup> Ga se tlhatho ye e fodišago motho. E no ba bea ka seemong go lebelela godimo le go amogela phodišo ya bona yeo Jesu a šetšeego a ba diretše. Le a bona? Go bewa ga diatla ke selo se sebotse kudu, gobane ke—ke Lengwalo. Eupša ga se tsela ya Bantle ya go fola.

<sup>5</sup> Ka go ye, ka Beibeleng, go be go le Mojuda yo a bego a na le . . . Morwediagwe o be a babja kudu, go iša lehung, gomme a hwa. Gomme o rile go Jesu, “Morwedi wa ka o robetše, o kgauswi le lehu, eupša etla gomme o bee diatla tša Gago godimo ga gagwe, gomme o tla fola.”

<sup>6</sup> Eupša ge Moroma, letona, Montle, ge mohlanka wa gagwe a be a babja, o rile, “Ga ke na maswanedi gore O tle ka tlase ga tlhaka ya ka. E no bolela Lentšu.” Seo ke se se retolotšeego pelo ya Jesu. O be a se a swanela go bea diatla godimo ga gagwe. O be a no nyaka go kwa Lentšu.

<sup>7</sup> Le a bona, ke rata kanegelo yeo. Ka gore, Moroma yola o lemogile gore o be a le monna ka maatlataolo. Gomme ge a rile go monna, “dira se” goba “dira sela,” o be a se dira. Gomme o lemogile maatlataolo ale a go swana—maatlataolo ka go Morena Jesu. Ka gore, o—o tsebile gore ge a rile go monna yo a bego a le ka tlase ga gagwe, “o a ya” goba “o a tla,” o be a swanela go mo obamela.

<sup>8</sup> Gomme o tsebile gore go babja gohle le malwetši a be a le ka tlase ga taolo ya Morena Jesu, kagona O be a se a swanela go tla, go bea diatla godimo ga mohlanka. “E no bolela Lentšu, gomme mohlanka wa ka o tla phela.”

<sup>9</sup> Gomme Jesu o maketše, gomme O rile, “Nna ga se ke hwetše tumelo boka yeo ka Israele.”

<sup>10</sup> Kafao, ka kgonthe ke a holofela gore ke phela go bona letšatši ge rena Maamerika re tla ba le mohuta wola wa tumelo. “E no bolela Lentšu, Morena, gomme mohlanka wa ka o tla phela.” Oo, e tla ba letšatši le legolo. Bjale re . . .

<sup>11</sup> Dinako tše dingwe ge tlotšo e le boima kudu, gomme dinako tše dingwe ga ke hwetše sebaka go dira pitšo ya aletara. Ba bangwe ba baena ba bangwe, Ngwanešu Sullivan goba ba bangwe ba baena ba ka ba go hlomphega mo, ba tla hlokomela seo.

<sup>12</sup> Yo mongwe a ka no bolela gore re be re no tšweletša phodišo Kgethwa. Phodišo Kgethwa e no swana le go ya go thea dihlapi. Ga o tsoge wa laetša hlapi huku. O no mo laetša tšeletši, gomme o tlimarela tšeletši gomme a hwetša huku. Kafao, yeo ke tsela go lego ka phodišo Kgethwa. E na le kgogedi ka gore e—e a laetša le go netefatša gore go na le Modimo yo a phelago gomme o na le kgahlego ka go wena. Gomme mosedumele o bona seo, ka pela leihlo la gagwe le a se swara le go tseba go na le Modimo yo a phelago, gomme ka gona o ka mothalong wa phološo nako yeo. Modimo o kgona go ya go mo laola nako yeo, le go mo tatolla ka gare. Kafao, seo ke se phodišo Kgethwa e lego bakeng sa sona, feela bakeng sa seo.

<sup>13</sup> Bašemané mo ba na le tše dingwe tša ditheipi, le tša dipuku, le direkoto, le go ya pele, gore ba na le kgwebo ye nnyane ya bona beng yeo ba e hlokamelago. Ga re . . . Bakeng sa nnamong, ke ne feela dipuku tšela, gomme tše dingwe tša tšona ke swanetše go di reka. Go na le tše dingwe tša tšona ke tša ka, ther. Tše dingwe ke dipuku tše ke di rekago go tšwa go Ngwanešu Lindsay, di bitšwago *Kanegelo ya Bophelo bja Ka*. Gomme ka gona go na le e tee yeo e bitšwago *Moprofeta O Etela Afrika*. Gomme—gomme ke a dumela dithero tše tharo goba tše nne ke tša ka. Ba na le tšona mo, e sego bakeng sa tšelete, feela gore Molaetša o tšwele ntle.

<sup>14</sup> Yeo ke kgwekgwe ya selo, go ntšhetša Molaetša ntle, ka gore re phela mo iring moragwana go feta ka mo re naganago. Ke mo go tswaleleng ga lebaka, gomme kereke e ka go seemo sa go šiiša, gomme re no leka go phatlalatša phadimo ya letšatši magareng ga batho. E sego go leka go ba fetola go ya go tše dingwe tša ditumelo tša rena, eupša go leka go ba dira ba phele kgauswana le Morena Jesu le go Mo dumela; e sego go goga maloko go tšwa kerekeng, go ya go kereke ye nngwe; eupša, go romela maloko a mantši go kereke yeo, ke morero wa rena.

<sup>15</sup> Bjale, feela pele re bula Lentšu, bakeng sa Molaetša wa mantšiboa, wo e lego wo mokopana . . . Ga re nyake go le swarelela botelele, gobane ba bantši ba tla go tšwa kgole go tšwa ka ntle ga toropo, gomme le swanetše go ya morago mošomong. Gomme re tla leta go fihla Mokibelo bošego, le go le swarelela

thari nako yeo. Gomme ka gona, Lamorena, ga wa swanelo go ya sekolong sa Lamorena go fihla ka masometharo a senyane.

Kafao a re inamišeng dihlogo tša rena feela nakwana, bakeng sa lentšu la thapelo.

<sup>16</sup> Morena, re leboga kudu, ka godimo ga kgopololo, ka sebakabotse go tla le go inamiša dihlogo tša rena go Modimo yo a phelago, le go tseba gore re tshepišitšwe, ke Morwa wa Gagwe yo mokgethwa, Morena Jesu, gore re ka kgona go ba le se re se kgopelago, ge re kgopela Tate Leineng la Morena Jesu, Morwa wa Gagwe. Gomme re netefaleditšwe gore re tla ba le poledišanonyakišio goba go kwewa ke Yena, ge re etla Leineng la Jesu, ka gore O rile, “Kgopelang Tate eng kapa eng Leineng la Ka, O tla e fa.”

<sup>17</sup> Gomme ka go felela re na le nneta, bošegong bjo, gore O a re kwa, le gore se re se kgopelago se tla fiwa, gobane re ikwela gore go kgopela ga rena ke thato ya Modimo. Ka gore O boletše, lefelong le le itšego, “Le a hloka, ka baka la gore ga le kgopele. Gomme ga le kgopele, ka baka la gore ga le dumele.” Morena, lebaka le re tlagoo ke ka baka la gore re a dumela. Gomme re a dumela gore O tla araba. Gomme dithapelo tša rena—tša rena ga di no ba go kwewa ke batho, eupša re a dumela gore O theeditše, gomme re na le nneta gore O tla re araba gobane O tshepišitše go dira. Re tla kgopela feela thato ya Gago go dirwa.

<sup>18</sup> A nke go be, bošegong bjo, Morena, gore modiradibe yo mongwe le yo mongwe yoo a lego fa, yoo a sa Go tsebego bjalo ka Mophološi wa bona, a nke bjo e be bošego bjo se sengwe se tla dirwago goba sa bolelwa, gore ba tla Go amogela bjalo ka Mophološi wa bona.

<sup>19</sup> A nke bao ba se nago Moya wo Mokgethwa, bošegong bjo, bao ba hlologetšego le go letela iri yela ge dikgapetla di tla wa go tloga mahlong a bona gomme ka gona tlhologelo ya pelo ya bona e tla fiwago go bona, O Morena, a nke Moya wo Mokgethwa, bošegong bjo, o tlatše pelo ye nngwe le ye nngwe. A nke go be ponagatšo ye bjalo ya Moya wa Modimo, go fihla disoulo tša bona di tla tsikinyega kudu, go fihla go kamaka gohole le ditumelokhwele di tla tšewa go tloga go bona, gomme Moya wo Mokgethwa o tla tla ka bophelong bja bona le go ba tswalelela ka Mušong wa Modimo.

<sup>20</sup> Efa, bošegong bjo, Morena, gore go ka se be le motho o tee a babjago magareng ga rena, ge tirelo e fedile. A nke yo mongwe le yo mongwe a fodišwe. Re ka se lebale bona ba ba lego ka dipetlele, le ba go tswalelwaa ka gare, le ka kgolegong, bao ba hlokago kgaogelo ya go teba ya Gago. Eba le bona, O Morena.

<sup>21</sup> Gomme ge re tloga, bošegong bjo, a nke re bolele, bjalo ka barutiwa, “Re bone dilo tša go se tlwaelege lehono,” gomme a nke dipelo tša rena di swe ka gare ga rena ge re eya magaeng a rena a go fapano. Re itshamile ka Wena, Mophološi wa rena, go

re fa dilo tše go ya ka tshepišo ya Gago. Gomme tshepišo ya Gago ka mehla ke thato ya Gago. Re e kgopela Leineng la Jesu. Amene.

<sup>22</sup> Ge le ka rata go phetla bošegong bjo ka go Dingwalwa tše kgethwa, go Puku ya Pele ya Bakorinthe, tema ya 11, re tla bala karolo ya Lengwalo, go thoma ka temana ya 23.

*Ka gore ke amogetše go tšwa go Morena seo le nna ke le neetšego sona, Gore Morena Jesu bjona bošegong bjo a ekilwego o tšere borotho:*

*Gomme ge a lebogile, o bo ngwathile, gomme o rile, Tšeang gomme le je: wo ke mmele wa ka, wo o ngwathilwego bakeng sa lena: dirang se go nkropolia.*

*Ka morago ga mokgwa wa go swana . . . o tšere senwelo gape, gomme ge a lebogile, a re, Se ke senwelo sa kgwerano ye mpsha . . . ka mehla ge le se nwa, e be go nkropolia.*

*Ka gore ka mehla ge le ej a bo borotho, le go nwa se senwelo sa Morena, le laetša pele lehu la gagwe go fihla a etla.*

*Kagona mang le mang a tla jago borotho bjo, . . . a nwa se senwelo sa Morena, a se a swanela, o tla ba le molato wa mmele le ma madi a Morena.*

<sup>23</sup> Bjale ke nyaka go bala se . . . sehlogo sa ka, go tšwa go masomepedi- . . . temana ya 29.

*Ka gore yo a jago le go nwa a sa swanela, . . . o tla ba le molato wa mmele wa Morena.*

<sup>24</sup> Bjale, emang. Ke badile yeo ka phošo.

*Ka gore yo a jago le go nwa a sa swanela, . . . a sa hlathe mmele wa Morena.*

*. . . o tla inwela go lahlwa yenamong, ka ge a sa hlathe mmele wa Morena.*

<sup>25</sup> Ke llile godimo ga Beibele ye, gomme e na le mafelo a mangwe a go galoga ka go yona.

<sup>26</sup> “Go se hlathe Mmele wa Morena.” Bjale, thuto ya ka bošegong bjo ke: *Go Hlatha Mmele Wa Morena.*

<sup>27</sup> Bjale, bofihlo bja rena bja Gosafelego ga bo beakanywe ka go felela ke se re se bonago le se re se kwago, eupša bo beakantšwe go tlhatho ye re nago le yona ya se re se bonago le se re se kwago.

<sup>28</sup> Paulo o be a sa ngangišane le bona bakeng sa go tšeal selalelo. Tiro ya bona e be e lokile, eupša tlhatho ya bona e be e fošagetše. Ka gore, go tšeal selalelo sa Morena ke taelo ya Morena, eupša go se tšeal ka ntle le maswanedi ka go se hlathe Mmele wa Morena, ke moo phošo e letšego. Bakriste ba ba be ba tšeal selalelo gomme ba sa phele bophelo. Bokriste ke boitemogelo le bophelo. Gomme Bakriste ba ba be ba no phela mohuta e ka ba ofe wa bophelo, ba dira mohlala wa go šokiša wa boipolelo bja bona. Gomme Paulo

o bolela, gore, "Ka lebaka le, ba bantši ba a babja le go fokola magareng ga lena, gomme ba bantši ba robetše," go rago gore ba hwile, "gobane ga se ba hlatha Mmele wa Morena."

<sup>29</sup> Gomme rena ba re ipitšago Bakriste renabeng, ga re ne tokelo go tšea selalelo ntle le ge re phela ka godimo ga kgobogo ya lefase. Ga re ne tokelo. Selalelo ke sa bao ba phelago gabotse, bjalo ka mohlala wa Bokriste. Selo se sempempe se lego lefaseng ke motho go leka go ekiša se sengwe, gomme go na le bontši kudu bja seo ka lefaseng lehono.

<sup>30</sup> Ga re feela, ka letšatšing le, molato wa bosenyi bja go swana bjo Paulo a bego a kgala kereke ya Bakorinthe bakeng sa bjona, eupša wa go leka go dira se sengwe seo Morena a se laetšego, ntle le go hlatha Mmele wa Morena. Gomme Mmele wa Morena ke badumedi.

<sup>31</sup> Eupša, lehono, re dira dilo, ntle le go hlatha le ge e ka ba lefe la Lentšu la Modimo. Re swanetše go ba le tlhatho go se sengwe le se sengwe re se dirago. Se swanetše go elwa ka Lentšu la Modimo. Tšohle tše Bakriste ba di dirago le go di bolela di swanetše go elwa ka Lentšu la Modimo.

<sup>32</sup> Lehono, batho ba fetogile nthatana kudu, gomme dinako tše dingwe ba bea potego kudu go se kereke e se bolelago go feta se Lentšu le se bolelago. Ba a dumela, gona, gore kereke e na le ditokelo tše kaonana go hlatha tatso ya rena go feta se Lentšu la Modimo le nago naso. Mohlala, ka mokgwa wo, kereke e ka no re, "Matšatši a mehlolo a fetile." Gomme batho ba bantši ba tla e dumela gobane ba nagana kereke e tseba kudu ka ga Lona go feta Moya wo Mokgethwa wo o ngwadilego Lentšu. Kagona, ga re kgone go hlatha dilo tša Modimo.

<sup>33</sup> Jesu o kile a bolela, gore, "Ntle le ge motho a tswalwa gape a ka se kgone go bona Mmušo wa Modimo, goba go kwešiša." Gomme ka mantšu a mangwe, "O ka se kgone go hlatha Mmušo wa Modimo go fihla o tswalwa gape."

<sup>34</sup> Batho ba ba tla tlago le go re botša gore, "Bao ba amogetšego boitemogelo bja kolobetšo ya Moya wo Mokgethwa," gore, "ke mahlanya." Goba, "Ke a mangwe a leina la go hlokamodimo," leo diabolo a hlobišitšego godimo ga Kereke, go ba bitša "bapshikologibakgethwa." Ke rerile ka lefaseng lohle, gomme ga se ka ke ka tsoge ka bona mopshikologimokgethwa le bjale. Ke leina leo diabolo a le gomareditšego godimo ga Kereke ya Modimo yo a phelago. Dinako tše dingwe batho ga ba ne tlhatho ya maleba. Ba boifa seo.

<sup>35</sup> A ga le tsebe gore Morena wa rena phatlalatša o lat-... o begilwe go ba motho wa go tshereana? Bafarasei, kereke ya godimo, ba rile, "Monna yola o tshereane ka hlogong ya Gagwe. O na le diabolo, gomme O a gafa." Gomme lentšu *gafa* le ra "go tshereana." Gomme ge ba Mmiditše "wa go tshereana," ke bontši gakaakang ba tla bitšago barutiwa ba Gagwe?

<sup>36</sup> Paulo o rile go Agaripa, “Ka tsela ye e bitšwago *bohlanya*, ‘go tshereana,’ ke ka tsela ye ke direlago Modimo wa botate.” Ke thabile kudu bosegong bjo go tšoena diatla le yena. Ka tsela ye e bitšwago “*bohlanya*,” go kereke ya sebjalebjale, yeo ke tsela ye ke rapelago Modimo. Ba be ba bitšwa “*mahlanya*,” gobane ga se ba hlatha Mmele wa Morena ka maleba, yeo ke, Kereke ya Modimo yo a phelago.

<sup>37</sup> Gomme Kereke, bosegong bjo, e bitšwa “*go gafa*” gobane batho ga ba ne tlhatho. Ge motho a tswetšwe gape, gomme o mpotša gore o tswetšwe gape, gomme ga o dumele gore phodišo Kgethwa ke tshepišo ya Modimo, gomme ga o dumele gore kolobetšo ya Moya wo Mokgethwa ke ya batho lehono, gona ke tla swanela go bolela gore tswalo ya gago e be e le ya moya wa go fošagala.

<sup>38</sup> Gobane, Moya wo Mokgethwa o boletše, gore, “Tshepišo ye ke ya lena le bana ba lena, le go bona ba ba lego kgole, le ba bantši ba Morena Modimo wa rena a tlago go ba bitša.”

<sup>39</sup> O e amogela ka kgopolو ya bohlale. Batho ba tšea lentšu la yo mongwe bakeng sa yona, gomme ga ba ne tlhatho. Ga ba kgone go hlatha gare ga nnete le phošo.

<sup>40</sup> Ke a nagana, lehono, gore, ba bantši ba rena ditšitširipa tša bohlale; e sego rena, eupša ditšitširipa tše ntši tša bohlale. Batho ba Modimo ga se nke ba ke ba ba dihlalefi tše kgolo. Beibele e boletše, gore, “Bana ba leswiswi ke ba bohlajana mo lefaseng le go feta bana ba Seetša.”

<sup>41</sup> Modimo o swantšha batho ba Gagwe le dinku. Ga se ditswerere le bohlale. O ba boloka ka tsela ye ba lego gore A kgone go ba etapele. Ge o leka go šomiša go nagana ga gago ga bohlale mong, o ka kgona, nako yeo o ntšhetša Modimo thwi ntle. “Barwa ba Modimo ba hlahlwa ke Moya wa Modimo.”

Eupša ke letšatši le legolo la bohlale le re phelago ka go lona.

<sup>42</sup> Fa, dikgwedi di se kae tša go feta, le e badile ka kuranteng. Godimo ka New York, ba bile le tshe—tshe sheko. Gomme bareri ba babedi ba bannyane bao ba ikwetšego ba hlahlwa ke Morena, nako ye nngwe ya go feta; baisa ba bannyane e ka ba go swana le nnamong, bao ba sa tsebegoo ABC ya bona. Gomme Morena o ba hlahlletše go Bowery. Gomme ba rekile moago wo o itšego, gomme fao ba be ba rera Ebangedi go baena ba bona ba ba welego. Feme ye nngwe ye kgolo e tlie go reka leo. Gomme bohole ba bona ba rekišitše, eupša bareri ba bannyane ba. Ba bile le kutollo yeo Morena a ba nyakilego go dula fale, kafao ba swere thoto ya bona.

<sup>43</sup> Gomme bolaodi bo ba tlišitše ka kgorongtsheko. Gomme ba rometše le go hwetša yo mongwe wa ditšitširipa tše kgolo tša bohlale, Moemedi Greenwall, gomme o dirile baisa ba bannyane bao go ikwela go lewa ke dihlong ka bobona. O beile mantšu a gagwe ka go nepagala kudu le go swana le thuto, le ka tsela ye e

lego gore baisa ba bannyane bao ba be ba sa tsebe mokgwa wa go mo araba. Ka gore, o be a le tšitsiripa ya bohlale, yo mongwe wa baemedi ba bakaonekaone ba lego ka go...ka New York. Gomme ba bile le baisa ba bannyane ba gakanegile kudu, ba be ba sa tsebe ba ka reng. Mafelelong, o feditše gomme a re, “Le reng ka bolena?”

<sup>44</sup> Gomme yo mongwe wa bareri ba bannyane o emeletše, gomme o swere diatla tša yo mongwe, gomme o rile, “Mohlomphegi, selo se nnoši seo re se tsebago, gore Morena o re boditše go tšea moago.”

<sup>45</sup> Gomme Moemedi Greenwall o rile, “Mo, emiša seo. Ga re nyake Morena ka go molato wo.”

<sup>46</sup> E ka ba dibeke tše pedi moragwana, sefofane se lekile go ya ka tlase ga leporogo, gomme se phonkgetše ka meetseng a aese. Gomme fao Moemedi Green, o robetše ka meetseng, a katana gomme a ehwa. Ke a makala ge eba o be a nyaka Modimo go lefelotiragalo lela.

<sup>47</sup> Molato e be e le eng? Ga se a ke a hlatha Mmele wa Morena, gobane bareri ba bannyane bale ba be ba tloditše ke Moya wo Mokgethwa gomme ba bile le thato ya Modimo. Ga re hloke go ba ditšitsiripa tše bohlale. Re hloka go ba bahlanka ba go kokobela ba Morena, le go hlatha Mmele wa Gagwe. Le ka moka botswerere bja gagwe, le bohlale bja gagwe, le thuto ya gagwe? Le a tseba, Beibele e rile, “Go kaonana go wena gore lwala le lekeletše molaleng wa gago, gomme o nweletše ka mabotebong a lewatle, go feta go kgopiša motlotšwa wa Ka.” Gobaneng, ke a nagana o bile le nako ye ntši go nagana go biletša Morena lefelongtiragalo, eupša ga se a ke a hlatha Mmele wa Morena.

<sup>48</sup> Dinako tše dingwe ke a makala ge eba rena Maamerika a bohlale re ne go hlatha go lekanelo go hlatha go nepa go tšwa go phošo. Gagolo, dikgorotsheko tše baswa di netefatša gore ga re na le bjona go hlatha go nepagala le go fošagala, bakeng sa bana ba rena, gomme ba bonala ba na le karabo ye botse ya rasaekolotši.

<sup>49</sup> Mohlala, ka mokgwa wo. Ge junior a etla godimo go papagwe gomme a tiba maoto a gagwe a mannyane, gomme a goelela le go šikinya hlogo ya gagwe, a re, “Papa, ga ke kgathale se o se bolelago. Ke nyaka koloi ya go šiašiana.” Woo ke mohuta wa Amerika.

Gomme tate o re, “Go lokile, junior, ke tla go rekela yona.”

O ka kgona go re go papa yola, “Gobaneng o e dirile?”

“Oo, ke a mo rata.”

<sup>50</sup> Elelwā, papa, junior o ya go gola go ba monna, letšatši le lengwe, gomme o tla nyala le go ba le lapa. Modimo thuša mosadimogatša yola yo a dulago le mošemane yo a godišitšwego

ka mokgwa woo, go ba le tsela ya gagwe ka se sengwe le se sengwe a se nyakago. Ga a kgone go hlatha go nepa go tšwa go phošo. Leo ga se lerato. Yeo ke go hloka tsebo ga go seka. Beibebe e a rereša. “Seketsa lepara, gomme o senya morwa wa gago.”

<sup>51</sup> Fanny yo monnyane o tla tla godimo go mme, gomme o ya go ya go rokenrole. Mme o a mmotša a ka se kgone go e dira. “Eupša, oo, mme, o sehlogo go nna.” Ka nnete, o rata Fanny, gomme o mo dumelela go ya. O tla tšwela ka ntle magareng ga sehlopha sela sa dihlakanahlogo, godimo ga ditsiebadimo tšohle tše; a tla ka gare, gomme a petla dipounama tša gagwe tše nnyane tša go pentwa le go go botša maaka, gore, “Ga go na tshenyo ka go yona.” Modimo a be le kgaogelo go monna yo a tla nyalago se sengwe boka seo bakeng sa mosadimogatša. Go hlatha go nepa go tšwa go phošo, ga re kgone go hlatha tša rena beng.

<sup>52</sup> Ke a makala dinako tše dingwe ge re ka kgona go hlatha go nepa go tšwa go phošo, bakeng sa mebele ya rena beng, gagolo Mmele wa Morena. Ga re hlathe go napa go tšwa go phošo, go tšwa mebeleng ya rena beng. Letšatši ka morago ga letšatši, le beke ka morago ga beke, kgwedi ka morago ga kgwedi, le ngwaga ka morago ga ngwaga, borasaense ba šoma ka dilaborating, le go bea mangwalo a magolo ntle, le se sengwe le se sengwe, le dikwalakwatsšo, gomme ba sebotša batho, “Kankere ka khathune.” Banna, dikete tše makgolopedi le masomešupa le metšo tša Maamerika ba tla hwa ngwaga wo go tšwa go kgogeng disekerete, gomme le kgoga thwi go ya pele. Ebile ga le kgone go hlatha mebele ya rena beng, ga re sa bolela ka go hlatha Moya wo Mokgethwa le ka Mmeleng wa Morena.

<sup>53</sup> A le bone athekele yela letšatši le lengwe, gore saense ye e tšweleditše tša gagwe, diphatišo tšohle tša gagwe? O rile, “Ga se feels go disekerete, go go fago kankere, eupša o na le sebaka sa diphesente tše masometlano bontši sa go tše e ka ba eng gape.” Gomme o kgoga thwi go ya pele.

<sup>54</sup> Basadi ba kopane le nna, nako ye nngwe ya go feta, ge ke rathile seo feels thata ka fao ke bego ke kgona. O be a le mokgogi wa go tlwaela. Gomme o rile, a bea noute ya gagwe ye nnyane ka potleng ya ka, e rile, “Bala ye ge o fihla gae.”

<sup>55</sup> Ke rile, “Ke a go leboga. Ke tla e bala bjale.” Gomme ke e ntšheditše ntle le go thoma go bala.

<sup>56</sup> O rile, “Ga se botho go modiredi mo phuluphithing go bolela kgahlanong le go kgoga. Ga o na le selo go dira le seo.”

<sup>57</sup> Ke rile, “Ke mošomo wa ka go bolela kgahlanong le e ka ba eng e fošagetšego.”

<sup>58</sup> Modimo thuša moreri yoo a se nago go hlatha ga go nepagala, go lekanelo, ga e ka ba eng yeo e fošagetšego; moreri yo a sa kgonego go hlatha tlhoko ya batho ba gagwe, ka Moya wo Mokgethwa. Modimo o rile, “Mmele wo ke tempele ya Moya wo Mokgethwa. Ge o o tšhilafatša, Ke tla o senya.” Re swanetše go

rera kgahlanong le sona. Bothata bja yona ke, re na le bareri ba bantši kudu ba go kgoga sekerete. Seo ke se e lego bothata. Gomme ba boifa go e bolela ka phuthegong ya bona, gobane ba a tseba ba ne molato, le bona.

“Ka go hlatha ka maleba; go aroganya ka maleba.”

<sup>59</sup> Wisiki, alekoholo, gobaneng, ba re, “E a gobatša.” Gohle godimo ga sekerini sa gago sa thelebišene, gohle godimo ga letlapakwalakwatšo le lengwe le le lengwe, ka go kuranta ya gago, ke khene ye kgolo ya bjala le basadi ba baswa ba go ratega ba e nwa. Ba le laetša ge ba thoma. Ba lebeleleng moragwana gannyane go tloga go seo. E tlatša monagano wa bona ka pheko ya mpholo. Go oketsegaga bogafa ga yona go a šiiša. E hlola maitshwarohlephi magareng ga baswa.

<sup>60</sup> Gomme le dikereke, lehono, di a rera le go šoma, tše ntši tša tšona, “Go nwa ka bosese.” Le a tseba yeo ke therešo. Ba botša batho ba baswa ba bona ka gae, le batswadi, “A nke bana ba lena ba nwe. Ba ya go nwa, go le bjalo, kafao nno ba rutang go nwa ka bosese.” Beibele e a e ahlola. Ga se ya loka. Modimo a thuše monna yo a se sa nago le tlhatho go feta yoo, goba kereke, a sa kgonego go hlatha go nepa go tšwa go phošo. Oo, ke letšatši la go šiiša le re phelago ka go lona.

“Go hlatha Mmele wa Morena.”

<sup>61</sup> Ka dikerekeng tša rená, le magareng ga batho ba rená ba kereke lehono, ke dihlong tše bjalo, ka tsela ye basadi ba rená ba dirago, le bona. Ba bantši ba bona ba apara diaparo tša maitshwarohlephi, dišothi tsela tše nnyane. Ke sebe kudu. Mohumagadi o mpoditše, gomme ba bantši ba mpoditše, ba rile, “Billy, bokaone o tlogele go bolela ka seo.” Aowa, mohlomphegi. Nka no swanela go rerela dikota, eupša ke tla be ke bolela Therešo. Yeo ke nnete. Ke Therešo. [Phuthego e opa magoswi—Mor.] Ke a le leboga. Ke phošo gomme ke sebe.

<sup>62</sup> Go na le mohumagadi yo motee o rile go nna, o rile, “Ga ke apare dišothi. Ke apara dileka.”

<sup>63</sup> Ke rile, “Seo se befile go feta. Beibele e rile, ‘Ke makgapha go Modimo, go mosadi go apara seaparo se se swanago le sa monna.’” Ke Therešo.

<sup>64</sup> Gomme morago boitshwarelelo ke, “Ga ba sa dira diaparo tše dingwe gape ntle le tše.” Eupša ba sa dira metšhene ya go roka le go rekiša mašela.

<sup>65</sup> Mosadi yo a ikapešago yenamong ka mokgwa woo, o ya go ba le molato wa bootswa, ka Letšatši la Kahlolo. O ka no ba o hlwekile bjalo ka lili, go monnamogatša goba lesogana la gago. Eupša Jesu o rile, “Mang le mang a lebelelago mosadi go mo kganyoga o šetše a dirile bootswa le yena ka pelong ya gagwe.” Kafao, o ka no be o se wa dira e ka ba eng ya phošo, ka kgonthé. Eupša ge o ikapeša ka bowena ka mokgwa woo, o itšweleditše ka

bowena go monna; o ya go swanela go arabela bakeng sa go dira bootswa, gomme wena o molato. Gomme kereke e dumelala seo, ka go se hlathe Mmele wa Morena. A kwelobohloko!

<sup>66</sup> Ba kota moriri wa bona. Beibele e boletše, gore, “Mosadi yo a kotago moriri wa gagwe, monna wa gagwe o na le tokelo ya go mo fa tlhalo,” gobane ga a botege. O boletše, gore, “O nyatša hlogo ya gagwe.” A yeo ke nnete? “Gomme monna ke hlogo ya mosadi.” Ke a tseba seo se makgwakgwa, eupša re hloka tlhatho.

<sup>67</sup> Re hloka go e hlatha ka Lentšu. Lentšu le a rereša. Go tsea Lentšu. Lentšu la Modimo ka mehla le a rereša. Ga re kgone go hlatha ka se batho ba se naganago, se dihlalefi di re botšago, se boramenagano ba re botšago. Re swanetše go ya ka se Modimo a se bolelago. “Motho a ka se phele ka borotho bo nnoši, eupša ka Lentšu le lengwe le le lengwe le tšwilego molomong wa Modimo.”

<sup>68</sup> “Go se hlathe Mmele wa Morena; ba bantši ba a fokola le go babja, ba bantši ba robetše, ba hwile, ba hwile semoyeng.” Kotlo ya mafelelo ye e iteilego Egepeta e be e le lehu. Kotlo ya mafelelo ye e iteilego kereke ke lehu la semoya. Se re se hlokago lehono ke go phafoga ga semoya, go phafoga ga semoya, go tlhatho.

<sup>69</sup> Batho ba ba ka no ba ba dirile se, oo, ka maikemišetšo a mabotse.

<sup>70</sup> Monna yola tlase Borwa, ngaka yela letšatši le lengwe, yo a filego monna yola esiti ya salefuriki ye e mmolailego. O bile le maikemišetšo a mabotse. O naganne o be a rereša, eupša o bile le tlhatho ya go fokola. Ga se a hlatha sehlare sa gagwe.

<sup>71</sup> Go swana le mosetsana yo monnyane yo a bego a sepela go theoga seterata, gomme o ile a hwetša katsana ye nnyane, gomme o be a kolobile gohle gomme a ka ba seripa sa go gatsela. Gomme o mo tseetše ka gare, a bula lebatı la obene gomme a mmea ka obeneng, go hwetša borutho. Maikemišetšo a gagwe a be a lokile, eupša go hlatha ga gagwe go be go fokola. Gobaneng, le se ke... Ga re šetše, re ya go paka katsana, le rena, ka tše dingwe tša tlhatho ya rena ya bohlale.

Makomonisi a tla godimo ga rena. Lefase le tla godimo rena.

<sup>72</sup> Dikereke tša rena di robegile. “Banna ba ikaroganya bonabeng, ba ikaroganya bonabeng, e sego go bonagala go ba le Tumelo,” go aroganya meriri godimo ga dithuto tše nnyane tša go se be bohlokwa. Re swanetše go tla mmogo, letsogo le pelo, le go rapela, le go ikona, le go bitša go fihla Modimo a romela morago Moya wo Mokgethwa, gore re ke re be le tlhatho ya semoya.

<sup>73</sup> Iri e tlide nakong ya bofelo bjale, re ka meriting ya go Tla ga Morena, gomme kereke ga e kgone go e hlatha. Re phela mo iring ya moragwana go feta le nagana.

<sup>74</sup> Ge Paulo a be a ka kgona go tsoga go tšwa bahung, bošegong bjo, ka Middletown, le bolela ka mollo wo o tukago! Ba be ba

tl̩ ba le yena ka kgolegong pele ga go hlaba ga letšatši, bjalo ka “segafa goba monna wa lebelete.” Monna yola, a tletšego ka Moya wo Mokgethwa, le go bona dilo di eya ka tsela ye di lego, le go tseba gore nako e batametše, go be go tl̩ ba tsošeletšo goba ba be ba tl̩ swanelo go tl̩ kgolegong go mo kwa. Yeo ke nnete.

<sup>75</sup> Bjale, oo, Jesu o rile, gomme Beibele e a e bolela. “Ka matšatšing a mafelelo, feela pele ga go Tla ga Morena, go tl̩ ba le maswao a magolo le dimaka di diregago ka lefaseng.” Gomme le a tseba, kereke e hwile kudu ka go thutamodimo, le mehuta yohle ya sekolo, le ditlhahlo, le lenaneo la thuto, go fihla le sa kgone go hlatha dilo tšeо.

<sup>76</sup> A Jesu ga se a re go kereke mo letšatšing la Gagwe, “Le kgona go hlatha sefahlego sa lefaufau, eupša maswao a nako ga le kgone go a hlatha. Ka gore ge nkabe le Ntsebile, nkabe le tsebile letšatši la Ka”?

<sup>77</sup> Iri ya tokologo ya kereke, gomme ga ba kgone go e hlatha. Re bjalo . . . Se sengwe se fošagetše. Ke bolela ka kereke ka moka, yo mongwe le yo mongwe yoo a ipitšago Mokriste bonabeng.

<sup>78</sup> Modimo a ka thoma go sepela, le dilo tša semoya di direga, batho ba phološwa le go tlatšwa ka Moya wo Mokgethwa; dikete tše ntši ba ba ipitšago Bakriste bonabeng ba tl̩ gogela morago go tšwa go Ona, le go re, “Oo, Bao! Bao, Bao ke bapshikologibakgethwa.” Ga le ne tlhatho ya semoya.

<sup>79</sup> Ka gore, se sengwe le se sengwe Moya wo Mokgethwa o se dirago se ngwadilwe ka Beibeleng. Ahlolang dilo tšohle ka Lengwalo. Ke ka mokgwa wo re hlathago, go bona ge eba tlhatho ya rena ke nnete.

<sup>80</sup> Ge Beibele e rile, “Jesu o a swana maabane, lehono, le go ya go ile,” ke a E dumela. Ge Beibele . . . Ge Jesu a rile, “Dilo tše Ke di dirago le tl̩ di dira le lena,” Ke a E dumela. Gomme ge Beibele e boletše, gore, “Moya wo Mokgethwa ke wa moloko wo mongwe le wo mongwe, ba bantsi ba Morena Modimo wa rena a tlago go ba bitša,” Ga ke dumele go šišinya seatla go tšeа lefelo la Ona.

<sup>81</sup> Ke a dumela Ke Moya wo Mokgethwa wa go swana wo o welego nako yeo, o laetša maswao a go swana, dimaka tša go swana. Hlatse ye kaonekaone re nago le yona, gore re ne Moya wo Mokgethwa, ke ge moyo wa rena o bea bohlatse le Lentšu.

<sup>82</sup> Ge re ipitša Bakriste renabeng le go re re tladišwe ka Moya, gomme re bona gore kolobetšo ya Moya wo Mokgethwa e tšholletšwe ntle go badumedi go mabaka ohle, gomme moyo wa rena o a re botša “Seo ke sa lebaka le lengwe,” le phošo. Yeo ke nnete.

<sup>83</sup> Ge Beibele e bolela gore Jesu Kriste o a swana maabane, lehono, le go ya go ile; ge moyo wa rena o rile, “Aowa, O hwile; O ile pele,” go ne se sengwe sa phošo.

<sup>84</sup> Jesu o rile, “Mediro ye Ke e dirago le tla e dira le lena. Bonang, Ke na le lena ka mehla, ebile go fihla bofelong bja lefase.” Gomme ge moya wa rena o gogela morago go tloga go Woo, ga re ne Moya wo Mokgethwa.

<sup>85</sup> Ka gore, Moya wo Mokgethwa o tla re, “Amene,” go Lentšu le lengwe le le lengwe A le ngwadilego. Bjale, tsebo ya bohlale e tla go gogela kgole go tloga go Lona, eupša Moya wo Mokgethwa o tla re, “Amene,” go Lentšu la Gagwe Mong. Ka kgonthe O tla dira.

<sup>86</sup> Gomme O a nyaka, le go tsoma, le go leka go hwetša yo mongwe yo A ka kgonago go ipea ka Boyena ka go yena. O hlologelwa go e hwetša.

<sup>87</sup> Le se nagane le ka kgora go fetša go loka ga Gagwe. A le ka eleletša, hlapo ye nnyane, botelele bja seripa sa intšhi, ntile bogareng bja Lewatlekgo la Pacific, e re, “Bokaonana ke nwe go botaeša meetse a; nka no felelwa?” Seo e tla no ba bošilo bjalo ka go leka go nagana o ka tsoge wa fetša go loka ga Modimo. “Kgopelang ka bottlalo gore thabo ya lena e tlale.” Dumelang Modimo go e ka ba eng A e tshepištšego. Ke ya lena.

<sup>88</sup> Baprofeta ba Testamente ya Kgale, Daniele le ba bangwe, ba boletše, “Ka matšatšing a mafelelo, gore, batho ba ba tsebago Modimo wa bona ba tla dira dikgolo.” Yeo ke tshepišo.

<sup>89</sup> Ge sehlalefi se lebelela dikgolo, ba tla re, “Oo, yeo ke saekolotši. Seo ke go bala monagano. Ke go šoma ga diabolo.”

<sup>90</sup> Eupša Moya wo Mokgethwa o tla araba morago, “Amene, yeo ke Therešo,” tlhatho ya nnete.

<sup>91</sup> Ba e tshepišitše. Jesu o e tshepišitše. Jesu o rile, “Mediro ye Ke e dirago le tla e dira le lena, ebile ye megolwane go feta wo le tla e dira, gobane Ke ya go Tate wa Ka.”

<sup>92</sup> Paulo o tshepišitše, gore, “Ka matšatšing a mafelelo,” ka Moya wo Mokgethwa, gore, “kereke e tla wa,” dimilione tša bona. “Go tla tla go wa, gobane batho ba tla ba hlogothata, monagano wa godimo, barati ba maipshino go feta barati ba Modimo; barobadikwano, baphari ba maaka, ba go se itshware, le banyatši ba bao ba lokilego,” e sego tlhatho ya maleba.

“Oo,” o re, “bao ke makomonisi.”

<sup>93</sup> Yoo ke yo a bitšwago Mokriste. Šetšang temana ya go latela. “Ba na le sebopego sa bomodimo, eupša ba gana maatla a bjona.” Ga go go hlatha ga semoya.

<sup>94</sup> Ge o na le go hlatha ga semoya gomme Moya wo Mokgethwa o le godimo ga gago, o na le go hlatha ga semoya. O re, “Amene,” go tshepišo ye nngwe le ye nngwe ya Modimo.

<sup>95</sup> Paulo o rile matšatši ao a tla ba gona. Re na le yona. E mo. E godimo ga rena. Gomme re a lebelela le go e bona. Re e kwa go tšwa mogohle.

<sup>96</sup> Gomme re dira eng? E swanetše go re gogela mmogo. Beibele e rile, “Go ikgobokanya renabeng mmogo, gomme gore bontši ge le bona Letšatši lela le batamela.” E swanetše go ba tsošeletšo e tee ka morago ga ye nngwe, le mollophatlalatša wa letago la Modimo o goditšwe ka kerekeng ye nngwe le ye nngwe le lefelo le lengwe le lengwe. Go tleng mmogo go gogolo, moo dikereke tšohle, “Ka pelo e tee le mmero o tee, di kgobokanago mmogo tšonabeng,” le go lebala thutamodimo ya bona ya madirwakemotho, le go llela go Modimo bakeng sa maatla a semoya le go hlatha ga semoya. Yeo ke iri ye re e hlokago.

<sup>97</sup> Nka no bolela se, gore, Jesu o re fa letšatši, bjalo ka ge ke se kgwathile bošegong bja go feta, go tseba nako ya bofelo. Jesu o rile, “Bjalo ka ge go bile ka matšatšing a Loto, go tla ba bjalo ka go Tleng ga Morwa wa motho.” Bjale, a moyo wa gago o hlatha se gabotse, “Bjalo ka ge go bile ka matšatšing a Loto”? Elelwang, Loto o be a le sekai sa Amerika. Go netefaditšwe. Sebe sa Sodoma e be e le eng? E be e le phapogo. Gomme naga ye ya rena ya Amerika, basadi ba inyatšištše bonabeng kudu go fihla methopo ya tlhago ya banna e fapošitšwe.

<sup>98</sup> Ke bile ka Los Angeles, beke e se kae ya go feta, ka go Banna ba Kgwebo ba Bakriste. Gomme ke topile ye nngwe ya dipampiri tša bona tša go tsebega le go bona moo yo mongwe wa basekasiki a boletšego, gore, “Phapogo le bohomoseke di oketšegile ka diphesente tše masomepedi godimo ga ngwaga wa go feta.”

Jesu o rile, “Bjalo ka ge go bile ka matšatšing a Sodoma.”

<sup>99</sup> Maphodisa, le go bolaya le tšohle tše, di no ya, nako yohle, bašemane ba go hlala, ba phela mmogo bjalo ka monna le mosadi; basadi ba phela ka tsela ye e swanago. Go fapošitše menagano ya bona, menagano ya bona ya ditšhila, gobane ga ba ne tlhatho ya semoya. Yohle ke kganyogo le tšhila. Gomme ga ba kgone go ikgotsofatša ka bobona ebile seng sa bona. Ebile ga ba nyale. Ba no tše le go ya ntle, go fihla ba fapošitšwe. Jesu o rile seo se tla ba ka matšatšing a mafelelo, gomme sese sona.

<sup>100</sup> Gomme gape le elelwang seo ka matšatšing a Sodoma. E ka ba mang, wena modiredi le lena baithuti ba Beibele, ke a dumela le tla dumelana le se. Ngk. Scofield le ba bangwe ba bantsi ba a dira, bontšintši barutiši bohole, Charles Fuller le go ya pele, ba dirutegi tše kgolo ka nageng. Gore, Abraham o emetše Moya, Kereke ya semoya. Loto o emetše kereke ya senama, goba ya tlhago. O be a le tlase ka Sodoma, ka sebeng. Efela, o be a na le toko ka go yena, eupša o be a hlakane le sona.

<sup>101</sup> Gomme elelwang, go be go le bareri ba babedi ba bohlale ba ba ilego tlase go rerele Sodoma. Ga se ba dira mohlolo; go no ba foufatša. Gomme therou ya sefapano e foufatša mosedumele. Seo

ke se dikopano tše kgolo tša Billy Graham le bona ba se dirilego. E ba dirile ba be gampe.

<sup>102</sup> Ge Billy Graham, dibeke di se kae tša go feta, ya go tsebega, le e kwele. Gore, ge a sepela ka Engelane, gomme o ile a swanela go tšeela mosadimogatša wa gagwe ka gare, go tšwa diphakeng, moo a bilego le tsošeletšo ye kgolo, gobane banna le basadi ba be ba dira ditiro tša thobalano thwi ntle ka phatlatalatša moo a bilego le tsošeletšo.

<sup>103</sup> A e dira botse bjo bo itšego? E sego bohlale. Go tla tšeа go biletšwafase ga bogale bja Modimo, le Mollo wo Mokgethwa go tšwa Legodimong, go tsoge gwa tliša phapano ka lefaseng, gomme e ka se be. Batho ba lebeletše pele go se sengwe se segolo go tla, gomme le bofelong bja se se šetšego se tlide. Maswao a mafelelo a filwe go kereke ya Bantle. Bajuda ba tla ba le Yona morago ga ge Kereke e hlatlošitšwe. Eupša re bofelong bja lebaka la Bantle.

Bjale, go no tswalela, nka no bolela se.

<sup>104</sup> A le lemogile ke mohuta ofe wa Motho yoo a šetšego morago, go bolela le Kereke ya semoya? A dula ka magetla a Gagwe tenteng (gomme Yena e le mosetsebje), gomme a re, “O kae mosadimogatša wa gago, Sarah?”

Gomme o rile, “O ka tenteng.”

<sup>105</sup> O rile, “Ke ya go go etela, Abraham, go ya ka tshepišo Ke go fago.” Gomme O...Sarah, ka gare, o segile ka gare ga gagwe mong.

Gomme Morongwa o rile, “Gobaneng a segile?”

<sup>106</sup> Jesu o rile, “Ka ge go bile bjalo ka matšatsing a Sodoma, go tla ba bjalo ka go Tleng ga Morwa wa motho.” Bjale a le a kwešiša? Le a kwešiša gobaneng bodiredi boka bjo bo ka kgona feela go ya go batho ba Ebangedi ya go tlala? A le bona moo bo tlago? Ke godišeditšwe ka kerekeng ya Baptist, gomme ke hlomamišitšwe moreri wa Missionary Baptist. Eupša ge Sengwe se rathile pelo ya ka, ke bile le tlatho gore Leo e be e le Lentšu la Modimo, gomme O Le dirile go bonagala.

<sup>107</sup> Ba mpoditše, “O tla ba mopshikologimokgethwa, Billy. Ga go yo a tla theetšago dilo tše bjalo ka Tšeо.”

<sup>108</sup> Ke rile, “Ge Modimo a Le rometše, Modimo a Le tshepišitše ka Beibeleng ya Gagwe, O tla ba le yo mongwe go Le theetša.” Yeo ke nnete.

<sup>109</sup> A re hlatheng Mmele wa Morena, re hlathe dinako tše re phelago ka go tšona. Re tla hwa, semoyeng, ge re sa dire seo. Gomme ge se e le therešo, gomme Moya wo Mokgethwa o na le rena, gomme re na le leswao la mafelelo la go Tla ga Morena, feela pele A etla...Elelwang, leo e bile feela pele Sodoma e tšhungwa, feela diiri di se kae pele e tšhungwa. Ke a dumela, lehono, bontši... .

<sup>110</sup> Bohle le kwele se Khrushchev a se boletšego letšatši le lengwe, go Maamerika. Le e badile ka maphepheng a lena. Setatamente sa gagwe sese. O na le go hlatha ga tlhago, o tla swara se. O rile, “Ge go na le Modimo, O ya go swiela tempele le go e hlwekiša, ka lena makapitale a go fetolanya tšhelete.” Le bona se seo se se rago, a ga le? Gomme o a rereša. Mohetene, diabolo, moitiriši boka yoo, o swanetše go lahla ditšhošetšo.

<sup>111</sup> Go le bjalo, ba robetše, ba dira sebe, ba a nwa, ba no hlokomologa, gobane ga ba ne tlhatho ya semoya ya Mmele wa Morena. A letšatši le re phelago ka go lona!

<sup>112</sup> Ngwanešu le kgaetšedi, go lena baratwa ba ka, ga ke leke go ba go tsea karolo. Ke no le botša Therešo. Ke no ba le boikarabelo ka Beibele. Gomme ke a le botša, ge le dumela ka go nna go ba moprofeta wa Gagwe goba mohlanka wa Gagwe, le dumela gore ke le botša Therešo. Bofelo bo kgaušwi. Bo kgaušwi bjang, ga ke tsebe, gomme ga go yo mongwe gape a tsebago. Eupša ke a tseba re phela ka meriting ya go Tla ga Gagwe.

A ga le kgone go di bona tšona ditšhošetšo? Le bona se ba nago naso.

<sup>113</sup> Setšhaba se leka go e tloša ka go nwa, go e tloša ka go sega. Le ka se kgone go e dira. Ba dira seo, go thibela go tsea tlhatho ya semoya yeo Modimo a ka kgonago go ba bontšha, mongwalo wa seatla mo lebotong. Re a tseba o gona. O ka o phatlola ka metlae, le Hollywood, thelebišene, goba wa dula gae gomme wa tsenatsenana le Leo ge o nyaka.

<sup>114</sup> Eupša monna goba mosadi wa kgonthe wa go tswalwa gape yoo a nago go hlatha ga Moya wo Mokgethwa o tla hwetša lefelo la gagwe ka kerekeng, go rapela le go goelela, le go dira tšohle tše di lego ka bophelong bja gagwe, go leka go tliša badiradibe ka gare. Nnete. Ge e le ya Modimo, a re direng. O swanetše go bea pelo ya gago ka go yona, ge o na le tlhatho. Šoma!

<sup>115</sup> O se ke wa no ya gomme wa re, “Ee, ke dumela Leo. Leo ke Therešo. Leo le lokile. Amene,” wa ya gae.

<sup>116</sup> Eya go šoma. O na le tlhatho. Šoma ge e sa le Seetša, gobane bošego bo a tla ge go se motho a ka kgonago go šomago. Šoma ge re sa na le mojako wo o bulegilego. Šoma ge re sa kgona go ba le dikopano tša go swana le ye. Tlišang baratwa ba rena ka gare. Ba tlišeng ka go Ebangedi. Hwetšang bagwera ba rena, baagišani ba rena. Modimo o hwetše batho bao. Gomme re swanetše go amega go lekanelo, ka bona, go šoma go fihla diatla tša rena di etšwa madi. Re tla tla re se ne selo ge re sa dire.

<sup>117</sup> Go swana le mosetsana yo monnyane godimo mo ka Kentucky, yo a hwilego e sego kgale godimo ka dithabeng, moragorago. Go be go le e ka ba bana ba seswai. Mosetsana yo motee yo monnyane, a ka ba bogare bja bona, tikologong ya mengwaga ye lesomepedi bogolo. Bosamme ba gagwe le dikgaetšedi tša gagwe, ba be ba tšwafa kudu, ba be ba sa dire

selo. Gomme mmagwe a robetše, a ehwa ka bolwetši bja go šiiša bja bolwetši bja mafahla. Gomme mosetsana yo monnyane, o be a mopa, a apea, go hlatswa, go hlokomela mmagwe, mola ka moka ga bona ba khekhelesa gohle, ba bapala gomme ba eya go thutha.

<sup>118</sup> Mafelelong, mmagwe a hwa, gomme ka gona mosetsana yo monnyane o ile a swanelwa ke go tšwela pele ka baka la gore ga go le o tee wa bona a bego a tla šoma. Gomme o šomile gomme o šomile, gomme o šomile go fihla, mafelelong, o swerwe ke bolwetši bja go šiiša, phepompe, gomme ba se ne sa go lekanelia go ja, le go ya pele. Mmele wa selo se sennyane o fokotše. O be a ehwa.

<sup>119</sup> Morutiši yo mongwe wa sekolo sa Lamorena o tlie ka gare go yena, o rile, "A o Mokriste?"

O rile, "Ee, ke nna yena."

O rile, "Ke wena wa kerekeleina efe?"

O rile, "Ga se nna wa kerekeleina e ka ba efe."

<sup>120</sup> O rile, "Gona mpotše, o ya go kopana bjang le Jesu? O ya go Mo laetša eng, o wa kereke efe?"

O rile, "Ke tla no Mo laetša diatla tša ka. O tla kwešiša."

<sup>121</sup> Ke nagana seo ke se A yago go lebelela godimo ga sona, rena bohole, ge re bona dikopano go swana le ge di eya pele mo. O ya go lebelela diatla tša rena le go bona se re se dirilego ka yona, tlhatho ya semoya.

"Go se hlathe Mmele wa Morena."

A re rapeleng.

<sup>122</sup> Ge diatla tšela di swanetše go ba mošomong, gomme le a tseba di swanetše go ba, a o ka se di phagamišetše go Modimo le go Mo kgopela go hlwekiša diatla tšela go tirelo ya Gagwe, ge re rapela? Phagamišetša seatla sa gago godimo.

<sup>123</sup> Morena, lebelela diatla tšela. Le tša ka, le tšona, Morena. Ke nyaka go tla bjalo ka lešole la go ba matswabadi. Ga ke nyake go tla ke se ne selo. Ke nyaka go rera go fihla ke ehwa. Ke nyaka go goga le go kgopela, le go ikona le go rapela, gobane ke a tseba meriti ya bošego e a wa gomme iri ka pela e batametše. Morena, bula mahlo a ka, go bona maswao a mantši a go Tla ga Gago. Tšhuma dipelo tša batho ba, bošegong bjo, ka dimaka tše kgolo tše O di tshepišitšego.

<sup>124</sup> Ge re bona kakanyetšopele ya lefase, le go kwa banna ba badiradibe ba goeletša, o "ya go swiela makapitale." Re lemoga gore ba na le dipomo fale go e dira ka tšona; feela lehlanya tsoko go e kgwatha. O swere, ka kgaogelo, go fihla O bea Kereke ya Gago komana.

<sup>125</sup> Morena, ke eng fa bošegong bjo, re dire komana. Bea dipelo tša rena ka go tirelo. Re bontšhe Bogona bja Gago, ka gore re a dumela gore O tsogile go tšwa bahung, gomme Moya wa rena o

hlatha gore O mo, Jesu wa go swana, maabane, lehono, le go ya go ile. O mo, ka sebopego sa Moya wo Mokgethwa, go šoma ka Kereke ya Gago, go fodiša le go phološa. Re kwe, Morena, ge ke neela batho ba le nnamong go Wena, Leineng la Jesu, Morwa wa Modimo. Amene.

<sup>126</sup> Oo, bakeng sa kgaogelo ya Gagwe, bakeng sa botho bja Gagwe! Ke no ikwela go gogolwa ka kgonth. Seo se be se le pelong ya ka. Ke ile ka swanela go se bolela. Ke a holofela ga se ka gobatša Momethodist ya ka, Mobaptist, goba mogwera wa Mopentecostal. Ge ke dirile, ke be ke sa re go le gobatša. Ke nyaka go le phafoša, go le šišinya gannyane. Re mafelelong.

<sup>127</sup> “Go se be le tlathotho ya Mmele wa Morena; go ikaroganya renabeng, go se bonale go beng le Tumelo.”

<sup>128</sup> Ge eba go kile gwa ba le nako yeo re hlokilego yo mongwe le yo mongwe wa lena, ke gonabjale. Le a ntlhoka, gomme ke a le hloka. Modimo o hloka bobedi bja rena. A re tšoeneng dipelo tša rena le matsapa mmogo. A re se naganeng, gobane re Nazarene, Pilgrim Holiness, Katoliki, Presbyterian, Mapentecostal, goba se re lego. A re beng Bakriste. A re hlatheng Mmele wa Morena, gomme re obeletše letsogo, go ebile le go modiradibe yo mobemobe, le go ba tliša ka lešakeng. Yeo ke thapelo ya ka ya go kokobela.

<sup>129</sup> Morongwa yola wa Modimo Yo a tlidego Sodoma, O tlide. O tshepišitšwe. Elelwang, Morongwa yola wa go swana o tlide. Yo mongwe le yo mongwe o a tseba gore Yoo e be e le Modimo. E be e se mmele wola, ka baka la gore mmele e be e le lerole.

<sup>130</sup> Ke boletše seo go yo mongwe, e sego kgale go fetile, gore, “E be e le Modimo,” ke boletše.

<sup>131</sup> O rile, modiredi, o rile, “Oo, bjale, Ngwanešu Branham, ga o dumele gore Monna yola e be e le Modimo?”

<sup>132</sup> Ke rile, “O be a le Modimo. Abraham o rile O be a le. O Mmiditše, ‘Elohim.’ Yoo ke Ramaatlakamoka Modimo. Yena; le Barongwa ba babedi.”

O rile, “Gabotse, o naganne O phetše ka mmeleng?”

Ke rile, “Seo se bonolo kudu.”

<sup>133</sup> Re dirilwe ka dielemente tše lesometshela; petroleamo, seetša sa khosmiki, le khalesiamo, photoše, go ya pele. Modimo o nno Mo kgobela go tlala seatla gannyane, O ile, “Fše;” o rile, “tsena ka kua, Gabariele.” Um-hum. “Fše; tepogela ka kua, Mikaele.” Gomme a hemela yo motee Yenamong. O rile, “Ke kwele Sodoma e kgauswi le go butšwa. A re yeng tlase gomme re bone. A re yeng tlase, renabeng. Abraham o be a rera, gomme ba bangwe ba be ba rera. A re yeng go iponela renabeng.”

<sup>134</sup> Gomme ba tlide kae? Go Bakgethiwa. Yena Yo yo a dutšego morago, o boletše le Abraham, gomme Abraham a Mmitša,

“Elohim.” Šetšang tlhakakgolo yela L, gomme le bone ge eba ga se nnete. Morena Modimo Jehofa o be a le ka mmeleng wa nama.

<sup>135</sup> O no se lemoge se Modimo a lego. Modimo a ka no kgona, “Fše.” Ke thakgetše ke tseba Modimo yola. Le lengwe la mašatši a nka se be selo eupša mohlomongwe molora wa bolekheno, eupša O tla bolela gomme ke tla tla bophelong gape. Yena ke Modimo.

<sup>136</sup> Mosadimogatša wa ka o rile, e sego telele go fetile, o rile, “Billy, o kgauswi le go ba hlogo ya lefatla.”

Ke rile, “Ga se ka lahlegelwa ke o tee wa yona.”

O rile, “E kae?”

<sup>137</sup> Ke rile, “Mpotše moo e bego e le pele ke e hwetša, ke tla go botša moo e ntetilego go tla.”

<sup>138</sup> Ke nnete. “Ga go moriri o tee wa hlogo ya gago o tla senyegago.” Modimo wa Legodimo, [Lefelo la go se be le selo godimo ga theipi—Mor.] Yo a laolago dilo tšohle, o tla re, “William Branham,” goba go ya pele, “etla pele,” gomme ke tla tla ka go swaneng le Yena. Haleluya!

<sup>139</sup> Modimo yola wa go swana, ka Moya wo Mokgethwa, o dula magareng ga rená, bošegong bjo, ka go letago la Shekinah, o inetefatša Yenamong ka maswao a go swana a tlhago ao A a dirilego.

<sup>140</sup> Ge morara o enywa diterebe lehono, o tla enywa diterebe gosasa. Ge e le morara wa terebe, ka mehla o tla ba le diterebe. Re ka se tsoge ra tsena ka tlase ga bohlale. Re tla swanela go tsena ka gare ka Moya wo Mokgethwa, gobane woo ke mohuta o nnoši wa Moya woo Kereke ya Moya wo Mokgethwa e o tšweletšago; dikenya tsa Moya, Bophelo bja Kriste ka go rená.

<sup>141</sup> Morongwa yola wa go swana o fa, hlatse pele ga Sodoma le tshenyego ya Gomora, e eya tshenyegong.

<sup>142</sup> Bjale a re boneng. Ke ba bakae ba nago le dikarata tša thapelo? Phagamišetša seatla sa gago godimo. Go ne masomenne goba masometlhano. Ke ba bakae ba se nago dikarata tša thapelo? Phagamišetša seatla sa gago godimo. Gabotse, go ne makga a mararo bontši. Go lokile.

Ke ikwela go hlahlwa go dira se sengwe.

<sup>143</sup> A re nong go tšea bao ba se nago dikarata tša thapelo. A nke bao ba nago le dikarata tša thapelo, mohlomongwe . . . Gabotse, ba ka kgona go tsena ka gare, le bona. Eupsa go tlhatho ye, re nyaka feela bao ba se nago dikarata tša thapelo. Emišang diatla tša lena gape, bao ba babjago gomme ba se nago dikarata tša thapelo, gore ke hwetše kgopolole gore le bomang. Go lokile.

Makgaolakgang šea.

<sup>144</sup> A le a dumela ke le boditše Therešo? A le a dumela le ne tlhatho ya semoya, go tseba gore Ke Therešo? Ga ra swanela go tla godimo fa.

<sup>145</sup> Ga se nna mofodiši, ke nna motho, Ke nna ngwanabolena, Kriste ke mofodiši wa lena, ge le ka no Mo lemoga go ba fa.

<sup>146</sup> Bjale, ge go etla go go fodiša, ge A be a eme thwi fa a apere sutu ye, O be a ka se kgone go go fodiša, gobane O šetše a e dirile. O be a ka kgona feela go netefatša gore O be a le Kriste. O be o tla e tseba bjang? Ka dienywa tša Moya, le a Mo tseba. Ke mohuta mang wa bophelo A bo dirilego?

<sup>147</sup> O dirile eng ge A be a le mo, go netefatša O be a le Mesia? Ge a laeditšwe, Petro le Johane, goba Petro le Nathaniele, le bona, ka go ba botša ba be ba le bomang, moo ba tšwago, leo e be e le leswao la Gagwe go Bajuda. Leo e be e le go tswalela ga lebaka la bona.

<sup>148</sup> Go be go le legoro le lengwe la batho ba Mo lebeletše go tla, bao e be e le Basamaria, e lego seripa sa Mojuda le seripa sa Montle. O boditše mosadi sedibeng ka dibe tša gagwe, gomme o le lemogile go ba leswao la Mesia. O rile, “Re a tseba gore Mesia o tla re botša dilo tše, eupša Wena o mang?”

O rile, “Ke nna Yena.”

<sup>149</sup> Bjale, ga se A ye go Bantle (a O dirile?), gobane Bantle ba be ba sa Mo nyake.

<sup>150</sup> Gomme ke ba bakae ba dumelago gore Modimo ke mohlokamagomo? Nnete, Yena ke mohlokamagomo. Gona A ka se kgone go bolela selo se tee goba go dira selo se tee *mo*, gomme a dira se sengwe godimo *mo*, gomme a ba moloki. O swanetše go dira selo sa go swana. Ge A na le polane ye kaonana, gona O swanetše go be a e dirile lefelong la pele; ge Modimo a bileditšwe go lefelotiragalo bakeng sa e ka ba eng, le kahlolo yeo A e dirago fale.

<sup>151</sup> Ge modiradibe yo motee a kile a llela go Modimo, gomme Modimo a mo phološa ka mediro ya tumelo ya gagwe, O swanetše go phološa modiradibe wa go latela, le modiradibe wa go latela, le modiradibe wa go latela. O swanetše go e dira nako ya go swana, goba O dirile phošo ge A pholositše modiradibe wa mathomo.

<sup>152</sup> O swanetše go dira selo sa go swana ka phodišo. O šetše a feditše mošomo woo. Selo se nnoši, seo, o swanetše go lemoga seo. Yena ga se nonwane. Yena ga se modimo wa histori. Yena ke Modimo, wa bjale, “Jesu Kriste wa go swana maabane, lehono, le go ya go ile,” gonabjale. A le a dumela gore O mo? A le ka e hlatha?

Ke nyaka go retollela mokokotlo wa ka go batheeletši ba. Ke tla rapela.

<sup>153</sup> Moya wo Mokgethwa o tla netefatša se ke se boletšego bošegong bjo, go tswaleleng ga Molaetša wo, gore maswao a go swana ao Jesu a rilego a filwe Sodoma a tla fiwa go moloko wo. “Ka ge go bile bjalo ka matšatšing a Sodoma, go tla ba bjalo ka go Tleng ga Morwa wa motho.” Gona le hlatha se Moya o lego fa.

<sup>154</sup> E be e le mang, gape, yo a babjago gomme a se na le karata ya thapelo? Re nyaka go hwetša dikarata tša thapelo. Re ya go rapelela bohole ba bona.

<sup>155</sup> Bjale, nka se kgone go le botša ke mang. Modimo o a tseba. Sa pele, ke no nyaka go hwetša yo mongwe yoo Moya wo Mokgethwa . . . Yo mongwe le yo mongwe wa lena, bjale e nong go thoma go rapela gomme le re, “Morena, nkgaogele bjale gomme o nthuše.” Gomme o bone ge A ka dira bjalo ka ge A rile O tla dira.

Ke no šetša leswao la Gagwe.

<sup>156</sup> Ke ba bakae ba tsebago gore Jesu, lehono, ke Pilara ya Mollo ye e latetšego bana ba Israele? “Ke tšwa go Modimo, gomme Ke ya go Modimo.” A seo ke se A se boletšego? Gomme ge Paulo a kopane le Yena tseleng go theogela Damaseko, O be a le eng? Seetša se segolo, Pilara ya Mollo. Ke Yena wa go swana lehono, Moya wo Mokgethwa wa Modimo. Mmele wa Jesu o dutše ka seatleng se setona sa Modimo, godimo ga Terone ya Gagwe ka Legodimong; eupša Moya wa Gagwe o mo lefaseng, o feleletsa le go fetša mošomo wa Gagwe.

<sup>157</sup> Gomme Moya wola wa go swana woo o phetšego ka mmeleng wa Jesu Kriste, e bile Moya wa go swana o bilego ka go Morongwa yola yoo a tlilego Sodoma le Gomora. A le dumela seo? Yena wa go swana yoo a latetšego bana ba Israele; Modimo wa go swana.

<sup>158</sup> Jesu o rile, “Ke nna Leswika leo le bego le le ka lešokeng. Botataweno ba ja mana, gomme ba hwile.” Gomme, “Ke nna Borotho bja Bophelo bjo bo tšwago go Modimo, go tšwa Legodimong. Ke nna Borotho bjoo. Ke nna Leswika leo.”

<sup>159</sup> “Gobaneng, O re O bone Abraham, gomme ga O ka godimo ga bogolo bja mengwaga ye masometlhano.”

<sup>160</sup> O rile, “Pele Abraham a be a ka ba gona, KE NNA.” KE NNA e be e le Mang? Seetša sela sa go tuka seo se bego se le ka sethokgweng, seo se boletšego le Moshe.

<sup>161</sup> Ke Jesu wa go swana bošegong bjo. Seo ke setatamente, a ga se sona? Ke hlohla seo, ke hlohla modumedi e ka ba mang go se dumela.

<sup>162</sup> Mohumagadi yo monnyane yo a dutšego fale, selo se sennyane se sešweu godimo ga kefa ya gagwe. O na le karata ya thapelo? O a babja? A re basetsebane seng sa rená? Modimo o a re tseba bobedi. Go ne Seetša godimo ga mosadi, ge le ka kgona go Se bona se dikologa thwi ka godimo ga gagwe. O be a rapela. A yeo ke nnete? Aowa, ga o ne sebaka go tla godimo fa, eupša o be o rapela, gobane, ke a bona, feela ka tlase ga seo ke moriti

wo moso. Ke lehu. Mosadi o apešitswe ke moriti go iša lehung. O na le kankere. A o a dumela gore Modimo a ka kgona go go fodiša? Kankere ya letswele. Gomme ke bona ngaka a e lebeletše, gomme o go botša gore o ya go leka go kara. Gomme o emetše karo. Gomme ke a go bona o sepela go tloga sefaleng, goba se sengwe gape. Wena o moreri, moreri wa mosadi. Seo ke O RIALO MORENA. A seo ke nnete, mohumagadi? Se A se boletsego, a seo e be e le nnete? Ema ka maoto a gago ge seo e le nnete.

<sup>163</sup> Bjale a le a dumela? Go hla- . . . A le kgona go hlatha gore yoo ke Jesu wa go swana yoo a kgwathilego . . . Mosadi o kgwathile kobo ya Gagwe, e sego nna; Yena. Ga ke tsebe mosadi. Ga a ntsebe. Modimo o a re tseba bobedi. Modimo a go šegofatše, kgaetšedi.

<sup>164</sup> Ke bona mohumagadi ka ponong. O a rapela. Ke mosadi yo moswa, o dutše thwi *mo*. Go na le se sengwe ka lesea. Ke, o nyaka . . . Aowa, o, o bile le lesea. Aowa, ke go phuma ga mpa. Seo ke se e bego e le sona, lesea la go hwa. O tšwa Kentucky, gomme leina la gagwe ke Martin. O go kae, Mdi. Martin? Ya, ka roko ye serolvana. Yeo ke thereso. A ke yona, mohumagadi? Ema ka maoto a gago ge eba go bjalo. Ga ke tsebe mosadi. Eupša Modimo o a mo tseba, gomme šole yena. A go šegofatše Leina la Morena Modimo.

<sup>165</sup> Thwi ka morago ga gagwe go dutše mohumagadi. O na le diphaele. O na le bothata ka lehlakoreng la gagwe la go ja, mohuta wa mosadi yo boima wa go apara roko ya go lebega boso. O na le karata ya thapelo, mohumagadi? Ga o nayo? Ga o e hloke. A o a dumela gore o bile le tumelo go kgwatha Sengwe? Ga se wa tsoge wa nkgwatha. O Mo kgwathile. Go lokile. Gona phagamiša seatla sa gago le sakatuku sa gago ka go sona, gomme o amogele phodišo ya gago. Eya gae gomme o fole, Leineng la Jesu Kriste.

<sup>166</sup> Lebelelang fa. Mohumagadi yo monnyane O dutše morago fa o apere roko ya go lebega magwadigwadi. O ne hlogo ya gagwe e inamišitswe. O rapediša tatagwe. O na le bothata bja sebete. O a dumela Morena o tla mo fodiša, kgaetšedi? O a e dumela? Gona o ka ba le yona.

<sup>167</sup> Mohumagadi, o be o le botho kudu go yena, go mmotša e be e le yena. Lebaka le o boletsego seo, gobane Moya wo Mokgethwā o sepeletše thwi godimo go wena, le wena. Yeo ke nnete. O na le karata ya thapelo? Ga o nayo? Ga o hloke e tee. O rapediša mme. Gomme o nagana go mo tliša kerekeng gosasa bošego. Yeo ke nnete. Ga wa swanelo go e dira. Bea diatla tša gago godimo ga gagwe gomme o bitše Leina la Morena Jesu. O tla fola, ge o ka e dumela.

<sup>168</sup> Ke hlohla tumelo ya gago. Ke mang gape a se nago karata ya thapelo gomme a nyakago go dumela?

<sup>169</sup> Wena, o dutše fa ka pele, o ntumela go ba moprofeta wa Modimo? Moprofeta ke motseta go lebaka. A o a dumela ke na le

Molaetša wa Modimo? [Ngwanešu o re, “Ee.”—Mor.] O a e dira? Ga ke go tsebe. Eupša Modimo o a go tseba. Ge Modimo a ka mpotša mathata a gago, a o tla e amogela bjalo ka phodišo ya gago, wa dumela gore ke ya Gagwe? O kgona go hlatha nako yeo, seo? Ge moyo wa gago o ka kgona go Mo kgwatha bjale ge ke sa bolela le wena, gona o tla amogela phodišo ya gago. A o tla dira? Ke sefega sa gago, thišu ya lebadi. Gomme ntle le seo, o moreri. Yeo ke nnete. Seo ke O RIALO MORENA. Dumela Modimo.

Ke ya go retolla mokokotlo wa ka.

<sup>170</sup> Rapelang, bonang ge eba Yena ke Morongwa wa go swana, bonang ge eba ke Modimo wa go swana yoo a tshepišitšego, ge A be a na le mokokotlo wa Gagwe o šotologetše tente. Rapelang, ba bangwe ba lena, gore Morena Modimo, Yo a romilego Morongwa wa Gagwe, le go netefatša gore Sodoma e be e le ka . . . Bofelo bo be bo batametše.

<sup>171</sup> O Morena Modimo, romela Morongwa wa Gago, bošegong bjo, le go fa tlathotho ya go swana, gobane ke tshepišo ya Morwa wa Gago. Gomme a go be bjalo.

<sup>172</sup> Mosadi o eme pele ga ka, gomme o tlaišega ka mamena a hlogo. O morago ka lehlakoreng *le*, ka gore ke ikwela yena a goga, tumelo ya gagwe. Leina la gagwe ke Mohumagatšana. Wiley.

<sup>173</sup> O mo kae? A re boneng. Morago ka *fa* felotsoko. E ka ba eng mohumagadi . . . Fale, a yeo e be e le therešo, mohumagadi? Go lokile. Eya gae gomme o fole.

Ebang le tumelo go Modimo. Ba bangwe ba lena ka moka rapelang, felotsoko.

A nke go tsebje, O Morena, Wena o Modimo.

<sup>174</sup> Go na le mosadi o eme pele ga ka, yo a rapelago morago ka batheeletšing, gomme o na le ditlhakahlakano. O apere roko ye khubedu le magwadigwadi a mašweu. Leina la gagwe ke Mdi. Lake.

<sup>175</sup> O go kae, Mdi. Lake? Ema ka maoto a gago, e ka ba kae. Modimo a go šegofatše. Eya gae gomme o fole. Tumelo ya gago e go pholosítše.

<sup>176</sup> Yoo ke Jesu wa go swana. Ke Morongwa wa go swana. A le na le tlathotho? Hlathang Mmele wa Morena. A le a dumela gore ke le botša Therešo? A le a dumela gore Kriste o fa bohlatse bja yona? Ge le dumela seo, phagamišetšang diatla tša lena godimo.

<sup>177</sup> Ke badumedi ba bakae ba lego ka fa, ba tla šikinyago diatla tša bona ka mokgwa *wo*? Gona, le a ntumela, bjalo ka moprofeta wa Modimo. Le se belaele, nthatana e tee. Tšeang diatla tšela tšeou le di šišinyago go lebanya go Modimo, gomme o di bee godimo ga yo mongwe kgauswi le wena, gomme o tla bona letago la Modimo. Seo ke sohle A kgonago go se dira. A le kgona go hlatha Mmele wa Morena? A le kgona go hlatha gore Moya wa Gagwe o fa?

“Maswao a a tla latela bona ba ba dumelago: ge ba bea diatla tša bona godimo ga balwetši, ba tla welwa ke maruru.”

<sup>178</sup> Morena Modimo, Mohlodi wa magodimo le lefase, Mothomi wa Bophelo bjo bosafelego, dira Sathane a tlemolle modumedi yo mongwe le yo mongwe ka mo. Ba beile diatla tša bona godimo ga yo motee go yo mongwe, gomme ke badumedi. Ba na le tumelo ka go Modimo, gomme ba a dumela gore O tla e dira. O Morena, Mantšu a Gago a ka se kgone go palelwa, go no swana le ditshepišo tša Gago. Gomme ditshepišo tša Gago e bile, “Ge ba bea diatla tša bona go balwetši, ba tla welwa ke maruru.”

<sup>179</sup> Bjale, Sathane, wena letimone la tšhila la kgatelelo, leo le itietšego batho ba fase leroleng, ke a go laela Leineng la Jesu Kriste, Morwa wa Modimo yo a phelago, gore o ba bofolle. Etšwa go bona, Leineng la Jesu Kriste.

<sup>180</sup> Bjale beanang diatla tša lena go lena seng, gomme le rapele thapelo ya tumelo. Gomme ge o ekwa Moya wa Modimo, o Le hlatha, gore ke tshepišo ya Modimo go wena.

<sup>181</sup> Yo mongwe le yo mongwe yoo a kgonago go kwa gore maatla a Modimo a sepela ka go wena, ema ka maoto a gago gomme o amogele phodišo ya gago. Ke a le laela, Leineng la Jesu Kriste, yo mongwe le yo mongwe wa lena badumedi, go phagama ka maoto a gago le go amogela Jesu bjalo ka mofodiši wa gago wa sebele. Etlang godimo, lena ka ditulong tšeо tša bagolofadi, dikhote, e ka ba kae e lego. Phagamang. Dumelang Modimo. Leineng la Morena Jesu Kriste, folang.

<sup>182</sup> Ba phagamela godimo, go tšwa dikhoteng le ditulong tša bagolofadi, le se sengwe le se sengwe.

Go lokile, Ngwanešu Sullivan. 

59-0812 Go Hlatha Mmele Wa Morena  
Miami Valley Chautauqua Campgrounds  
Chautauqua, Ohio U.S.A.

NORTH SOTHO

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## **Tsebišo ka tokelo-kgatišo**

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

**VOICE OF GOD RECORDINGS**

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)